

- यूनेस्को भगवद गीता अर नाट्यशास्त्र ने मेमोरी ऑफ वर्ल्ड रजिस्टर मांय भेळा कर्या।
- विश्व विरासत दिवस आज— राज्य रा पुरातत्व महकमा रा स्मारकां मांय सैलाणियां ने मुफ्त आवण दीरीज्या।
- देशभर मांय आज गुड फ्राइडे माथे गिरिजाघरां मांय खास प्रार्थना सभावां रो आयोजन—गुरु तेग बहादुर साहेब रो प्रकाश पर्व सिरधा रे साथे मनायो जावे।
- प्रदेश मांय घणखरी ठौड़ां करडी गर्मी रो असर—आवता दो दिन जोधपुर अर बीकानेर संभाग मांय कुछ ठौड़ां आंधी चालण रा आसार।

000

श्रीमद्भगवद्गीता अर भरत मुनि रा नाट्यशास्त्र ने यूनेस्को रा मेमोरी ऑफ द वर्ल्ड रजिस्टर मांय भेळा करी ज्या। केंद्रीय पर्यटन अर संस्कृति मंत्री गजेंद्र सिंह शेखावत रा सोशल मीडिया माथे एक पोस्ट रा जवाब मांय प्रधानमंत्री नरेंद्र मोदी वां री सराहवना करता कह्यो के इण ऊं भारत रा कालातीत ज्ञान अर मजबूत संस्कृति ने दुनिया मांय मानता मिली है। वणा कह्यो के गीता अर नाट्यशास्त्र दोन्यू सदियां ऊं सभ्यता अर चेतना ने पोषित कर्या है अर इण ऊं मिली अंतर्दृष्टि दुनिया ने सीख देवे है। ई कामयाबी माथे मुख्यमंत्री भजन लाल शर्मा खुशी जतावता इण ने देश सारू मान रो विषय बताया। ध्यानजोग है के यूनेस्को मेमोरी ऑफ द वर्ल्ड रजिस्टर मांय अबै कुल 14 भारतीय ग्रंथ भेळा व्हे ग्या है।

000

विश्व विरासत दिवस माथे आज प्रदेशभर रा पुरातात्विक ठौड़ा अर धरोहरां माथे न्यारा—न्यारा कार्यक्रम व्ह रह्या है। विरासत दिवस रो ई साल रो मुद्दो—विरासत स्थलों पर आपदा और संघर्ष का संकट राखी ज्यो है। ई मौके सगळा संरक्षित स्मारकां मांय देखण वाळा सारू मुक्त प्रवेश राखी ज्यो। भारतीय पुरातत्व सर्वेक्षण री ई पहल रो मकसद लोगां ने देश री मजबूत सांस्कृतिक विरासत रे प्रति जागरूक अर प्रेरित करणो है। अजमेर जिला मांय ई सगळा स्मारका मांय पुरातत्व महकमो आवण वाळा सारू आज मुफ्त राख्या।

-----

जैसलमेर मांय विरासत दिवस माथे सोनार किला मांय हैरिटेज वॉक निकाळी ज्यी। ई मौके नामी पटवा हवेली माथे चित्रकला अर फोटो नुमाईशी ई लगायी ज्यी। पाली मांय राजकीय कन्या छात्रावास री पढेसरा ने बांगड़ म्यूजियम दिखायी ज्यो। भीलवाड़ा जिला रा शाहपुरा मांय केसरी सिंह बारहठ संग्रालय मांय सैलाणियां ने मुफ्त आवण दीरीज्या। मुख्यमंत्री भजनलाल शर्मा विश्व धरोहर दिवस माथे लोगां ने शुभकामनावां देवता राजस्थान री संस्कृति अर समृद्ध ऐतिहासिक विरासत अर धरोहरां ने बचावण सारू संकल्प लेवण री अरज करी।

000

इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कह्यो है के लारला 10 साला मांय इलेक्ट्रॉनिक विनिर्माण मांय पांच गुणा बढवार व्ही है। आज गुड़गांव रा मानेसर मांय खबनवीसा ऊं बतळ करता श्री वैष्णव कह्यो के मेक इन इंडिया पहल रे कारण इलेक्ट्रॉनिक विनिर्माण हलका मांय मोटो उछाळ आयो है।

-----

श्री वैष्णव ओ ई कह्यो के प्रधानमंत्री नरेन्द्र मोदी अजैई इलेक्ट्रॉनिक घटक विनिर्माण योजना मांय मंजूरी दी है, जिण ऊं इलेक्ट्रॉनिक्स विनिर्माण पारिस्थितिकी तंत्र और मजबूत होवेला अर रोजगार ई बधेला ।

000

आज गुड फ्राइडे है। ई मौके प्रदेशभर रा गिरिजाधरा मांय खास आयोजन व्हे रह्या है। संवारा प्रार्थना सभावां राख्यी ज्यी अर प्रभु ईशु मसीह रा आखिरी संदेश पढ़ ने सुणायी ज्या। ईसाई समुदाय रा लोगां प्रभु ईशु रा बलिदान अर त्याग ने अपणावण अर वां रा बताया मार्ग माथे चालण रो संकल्प लियो। ध्यान जोग है के गुड फ्राइडे माथे प्रभु यीशु मानवता ने पाप ऊं मुक्ति दिलावण सारू आप रो जीवन निछावर कर दियो हो। ई दिन लोग मानवता अर आपसी भाईचारा ने मजबूत करण रो संकल्प लेवे है। ई बीचे आवता दीतवार ने प्रभु यीशु रा पुनर्जीवित होवण रे मौके ईस्टर ने देखता ईसाई समुदाय खास आयोजनां री तैयारियां सुरू कर दी है। प्रधानमंत्री नरेन्द्र मोदी गुड फ्राइडे माथे प्रभु यीशु मसीह रा बलिदान ने याद कर्या है। एक सोशल मीडिया पोस्ट मांय श्री मोदी कह्यो ओ दिन आपा ने प्रेम, सहानुभूति, दयालुता अर उदारता री सीख देवे है।

000

सिक्ख पंथ रा नौवां गुरु, गुरु तेग बहादुर साहिब रो प्रकाश पर्व आज रीत मुजब सिरधा रे साथे मनायो जावे। गुरु तेग बहादुर रो जन्म 16 सौ 21 मांय अमृतसर मांय व्हे हो। वां ने एक निर्भीक योद्धा रे साथे ई आध्यात्मिक विद्वान अर कवि रा रूप मांय जाण्या जावे है। ई मौके गुरुद्वारा मांय शबद कीर्तन रा आयोजन कर्या जावे। प्रधानमंत्री नरेन्द्र मोदी गुरु तेग बहादुर ने वां रा प्रकाश पर्व माथे सिरधाजली अर्पण करी। एक सोशल मीडिया पोस्ट मांय वणा गुरु तेग बहादुर ने देश रा सब ऊं महान आध्यात्मिक पथप्रदर्शकां मांय एक बताया। वठे ई मुख्यमंत्री भजनलाल शर्मा प्रकाश पर्व माथे शुभकामनावां देवता गुरु तेग बहादुर ने धर्म अर मानवता रा रक्षक बताया है। प्रदेश मांय ई प्रकाश पर्व रे मौके गुरुद्वारा मांय खास धार्मिक आयोजन कर्या जावे। श्रीगंगानगर, कोटा अर जयपुर मांय गुरु तेग बहादुर साहिब रा प्रकाश पर्व माथे शबद कीर्तन समेत न्यारा-न्यारा धार्मिक आयोजन व्ह्या। हनुमानगढ़ जिला मांय ई न्यारा-न्यारा गुरुद्वारा मांय प्रकाश पर्व मनायो जावे।

000

केन्द्र सरकार आज खुलासो कर्यो है के उपग्रह ऊं टोल शुल्क प्रणाली पैली मई ऊं सुरू करण रा बारा मांय कोई फैसलो नी लीरीज्यो है। इण ऊं जुड़ी मीडिया खबरां रो खण्डन करता सड़क परिवहन अर राजमार्ग मंत्रालय कह्यो के नी तो मंत्रालय अर नी ई भारतीय राष्ट्रीय राजमार्ग प्राधिकरण ई बारा मांय कोई फैसलो लियो है। मंत्रालय कह्यो के टोल प्लाजा री मार्फत वाहनां रे बे रोक-टोक, आवण जावण तैय करणो अर जात्रा रो बगत कम करण सारू चुणी ज्या टोल प्लाजा माथे फास्टैग वाळां बाधारहित स्वंचालित नंबर प्लेट पहचान टोल प्रणाली लागू करी जायेला। ई प्रणाली मांय स्वंचालित नंबर प्लेट पहचान तकनीक अर मौजूदा फास्टैग प्रणाली ने आपस मांय जोड़ी जायेला।

000

प्रदेश मांय घणखरी ठौड़ां मांय करड़ी गर्मी रो असर बण्योड़ो है। बारां, पाली अर चूरू जिलां मांय आज दिन मांय करड़ी गर्मी रे चालता दोपहरां लोगां री आवाजाही कम री। फलौदी जिला मांय तेज गर्मी अर लू ऊं जिन्दगी माथे असर व्ह्यो।

-----

बाड़मेर अर बालोतरा मांय आज धूलभरी आंधी चालण ऊं लोगां ने गर्मी ऊं थोड़ो आराम मिल्यो। जैसलमेर जिला मांय करड़ी गर्मी, लू अर तापघात ने देखता लोगां री बिजली, पाणी अर मेडिकल सेवावां ऊं जुड़ी समस्यावां बेगी निपटावण सारू जिला प्रशासन नियंत्रण कक्ष थापित कर्यो है। मौसम केन्द्र जयपुर रा निदेशक डॉ. राधेश्याम

शर्मा बतायो के आवता दो दिन, जोधपुर, बीकानेर संभाग मांय कुछ ठौड़ां माथे तेज धूलभरी हवा चालण रा आसार है।

000

प्रदेश मांय घुमंतु जातियां रा सगळा पिरवारां ने रहवासी पट्टा दिया जावेला। चित्तौड़गढ़ दौरा माथे पूर्या शिक्षा अर पंचायती राज मंत्री मदन दिलावर घुमंतु जातियां रा पिरवारां रे साथै संवाद कार्यक्रम मांय बोलता वणा कह्यो के घुमंतु जातियां ने दीरीज्या प्रमाण पत्र ई वां रा पहचान-पत्र है। ई कारण वे इण री मार्फत न्यारी-न्यारी सरकारी योजनावां रो फायदो उठावे। वणा कह्यो के पहचान-पत्र री मार्फत ई वां ने पट्टा दिया जायेला। शिक्षा मंत्री घुमंतु पिरवारां री समस्यावां न सुणी अर वां ने आप रा टाबरां ने पढ़ावण री अरज करी।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय ई महीना 27 अप्रैल ने विचार बतावेला। आ ई कार्यक्रम री 121वीं कड़ी व्हेला। ई सारू आप ई 25 अप्रैल तांई सुझाव भेज सको हो। आप मुफ्त नम्बर 1800-11-7800 डायल कर र राय दे सको हो। नरेन्द्र मोदी एप या माय जीओवी ओपन फोरम रे जरिए ई सुझाव दिया जा सके है।